

盾

墨

嶺南自壬辰汜甲午三年中凡五用兵蓋始於平峒
猺繼則征臺灣收海盜防越南邊境禦西蕃兵船徵
發駱驛飛文橫草之餘輒疏其厓略而官司作文書
羣吏抱牘進每一事必檢一舊籍以比麗之因仿其
例每記一近事復進而證之於昔以具其本末迨本
末具而得失顯焉吾以是知猺難起於宋熙崇閒之
開邊拓地撤其捍蔽也吾以是知排猺頑梗必防之
如猛獸撫之如嬰兒也吾以是知臺灣天險昔之亂
以富而無教者多今之亂又以貧而無業者眾也雇
商船匿官軍知爲捕盜之要策捐外洋守內洋知爲

防海之勝算也兩存以弱其勢則自守嚴而內附堅
知制夷之計審玩則懲而貳則絕操縱自我知馭蕃
之道得也書所謂鑒於成憲其罔有愆則舊籍之所
繫亦云重矣然有時而輕之則以不用故夫事無窮
而知無涯博其知以應其事亦惟取諸豫焉是故吏
之籍猶國之兵可不用而不可不備則終欲輕之其
可得邪方今嶽奠海安四裔賓服文武重臣慎固封
守儆誠不怠以宣布 朝廷德威使邊疆民庶永

享太平可謂盛矣而羈旅顛頓之士贏糧道路槩括
見聞猶於防邊制夷鯁鯁然引以爲慮豈言之有足

重歟亦聊備之而不必期於用也因其事同文類都
爲若干卷皆行閒所作題曰盾墨云爾湯彞自題

盾墨者余友湯子幼尊前在粵督盧敏肅公幕府從
征而作也通侯世閥家擅銀槍大樹威風門多列戟
君生而倜儻長益恢奇胸貯五兵才踰一石上馬殺
賊騎牛讀書得太公之陰符熟奇肱之陣法薰香摘
豔則令屈宋作衙官長劍短歌則呼龍淵爲知己志
旣卓犖名乃橫翔以文陣雄師作諸侯上客桓司馬
蓮花之幕遠映時髦唐令狐桂管之徵彌工章奏飛
鉗遁甲高談武帳之旁桐帽樓鞍長楫將軍之座先
是楚南逆猺倡亂衡永敏肅公以全湖之節親督戎
行耳其重名用資匡略君屈指能祿舉步知方建入

戰入克之謀、運九地九天之智、黑山收四百三部落、
電卷猋馳、桑公揮一十五將軍、山搖嶽動、凡所擘畫、
悉中機宜、故能草薶淳維、燹焚服匿、三豕磔蚩尤之
魄、千刀剗王莽之胸、積甲與熊耳山齊、紀績在狼居
胥上、固已決勝千里、論功一時矣、旣而青犢遊魂、焦
梨甫齧、藍侯宵醜、惡莠潛芳、孫恩方說水仙、張魯廼
稱米賊、公旣牙璋移沔、君亦前箸再籌、其地也嶮類
紅洲、荒踰烏游、蛇腥撲地、毒於頭痛之山、蠱霧撩天、
阻絕背寇之陣、飲黃虜之血、壯士魂銷、聽蒼兕之呼、
前旌膽慄、加以延陀妖雪、拂面晨飛、昆野壞雲如山、

夜落銅焦挂月。噤萬馬以無聲。琅鐸敲霜擁千牛而
自衛。君乃獨揮長策。自曳短裘。軟屐能行弓弦亦啖
銅魚十二。呵叱風雷。金翅三千。飛騰茶火。每當旗邊
日落。耳後風生。碑仆蜻蛉池。驚鶩鴨入。則篝燈治事
立草百函。出則運槩如飛。自成一隊。十盪十決。四正
四奇。遂使板楯心驚。提陴魄慄。金蠶自喪。銀鵠先奔。
剝羊皮而草降書。執旄尾而歌奉聖。桶裙花布請盟。
則清酒黃龍。銅鼓盧笙。獻愷則琴驃。獨鵠。殃徒噩噩。
全銷蠶尾之鋒。郎火喁喁。永戢豺牙之毒。若斯編所
紀。猶足見袴褶之雄心。弓衣之壯色焉。獨是十行露

布爭傳金于之詞一笥風馳未受魯連之賞新息之
據鞍顧盼馬革幾償定遠之投筆飛揚虎頭自笑和
放翁之句夢中快奪松亭聽斛律之歌曲裏空悲勅
勒船脣車耳長爲汗漫之遊劍膽琴心大有棲遲之
慨殘年射虎願隨李廣入山中夜飯牛嬾效甯生扣
角展斯卷也又不勝搔首低徊撫髀枵觸者矣所願
他日者人翼能飛一鳴直上詔書五色徵李渥於河
東封事廿條召馬周於門下將必有鏡清寰海氣吐
虹霓摩崖則載筆空同書績則垂榮宗布者又豈徒
墨磨盾鼻寫其奇懷米泔矛頭形其隄峭而已哉丙

申八月二十七日番禺居溥少相

才子從軍嶺外歸今時王粲見應稀故人踵戶鈔籌
筆當路停車訪布衣能讀父書非墨守自關天授等

文機東山濛雨慙前事鏡唱旋來守舊扉

嘉慶初元余曾從征

五湘潭夏尙忠雲溪

溼草朝騰萬竈煙朔風吹破虎皮韉

君有風雪從軍行看

此行

不負南陽顧熟讀陰符二十年

歲月拚從盾鼻磨

毛錐豈愛蔡州驚功成一笑拂衣去詩思近來驢背

多生涯辛苦歎矛頭射虎何如狎鷺鷗東髮從戎

今老大愁城祇恨酒兵柔松江湯貽汾雨生

盾墨目錄

卷一

壬辰征猺記

八排兵事考

卷二

壬辰征臺記

臺灣內附考

卷三

粵海捕盜記

海寇考

越南內訌防邊記

附越南檄文

越南建置疆域考

附表文

越南元號錄

卷四

暎咭喇兵船記

市舶考

附西洋通市諸國

西洋至中國海道

澳門西蕃

絕暎夷互市論

盾墨卷之一

壬辰征猺記

義化書局叢刊
幼尊卷

猺之類甚蕃錯居五嶺腹背有土猺獫狁猺獠猺過山
箭桿頂版之別大都皆蠻族也路史引伯益經云黃
帝曾孫卞明生白犬是爲蠻人之祖而漢書謂爲槃
瓠狗種杜君卿非之得毋因白犬之名而傳訛與蠻
自漢以來叛服不常惟以蠻制蠻爲上策總不外乎
剿撫兩端而宋主撫故沅州誠州之建廢日繁明主
剿故韓雍李震王守仁之師徒時起 國朝則因時

因地剿撫互施諸獠畏懷

威德百餘年來伏莽

潛消復擇土獠之秀者列諸庠序易其名曰新生化
獠狂而冠裳之實足超軼前代矣過山獠者卽郡國
利病書所謂食盡一山卽移一山是也而信鬼崇巫
恒與民構怨道光辛卯湖南江華有過山獠趙金龍
者居錦田之長塘寨業巫覡以端公降神爲衆獠所
尊信屢與民人訐訟有司不直之獠益怨民先是常
寧獠趙福才揚言通仙術山中將有獠王興趙金龍
貌偉多才願助起事金龍惑之潛結八排九冲獠千
餘人遂起爲亂冬十二月二十九日出焚兩河

沈

田冲各民村執匪徒與有宿仇者數人殺之壬辰正月三日江華縣令林先樑會遊擊王俊率兵役往捕賊拒敵戕兵胥分遣逆黨出掠迫脅土徭響應漸衆永州鮑鎮軍友智先於初五日檄調附近兵七百餘名李郡守銘紳募鄉兵八百十五日齊抵錦田十九日分兩道進攻長塘西路兵連戰偪賊巢二十日黎明東路兵亦焚夾冲平山抵長塘趙金龍挈逆屬黨與九百餘人遁東路兵仍由平山出屯兩河口賊尾之過夾冲東折黃竹寨於是官軍皆在後賊遂如入無人之境矣迨鎮軍分遣將兵堵藍山縣大橋諸隘

賊已入將軍坪葛藤冲寧遠縣之大小紫金山屢拒官兵隨地脅掠時鎮軍徵寶慶各兵畫定信地防堵九疑要害皆以道遠未至賊復乘虛四竄俄鎮軍郡守皆以輕進被劾兵心益懈二月十二日海提軍凌阿抵寧遠寶慶兵亦至時賊屯九疑山內如提軍駐寧遠縣城設疑兵於下灌等處賊必懼不敢出將坐困山內而錦田大橋各兵躡其後成擒必矣乃藍山告急日再至其實賊入九疑藍山在賊後提軍不設偵探未審賊之所向以爲藍山事急卽趣兵往援十四日天微雨誤由僻道至池塘墟山口賊分隊突出

官兵不及陣遂潰提軍及副將馬韜遊擊王國瑞備吳鑑皆被害兵械盡失賊勢始張二十四日犯新田縣令王鼎銘令僕懷印走省城自率鄉兵至高塘禦賊戰歿賊遂陷縣治桂陽常寧新田各徭趙福才趙文鳳皆糾衆起盧督府坤至永州奏徵鎮筵等處兵七千餘人上復命湖北羅提督思舉領鄖

竹兵一千貴州余提督步雲領黔兵一千會剿三月朔日我兵入新田賊遁屯楊家鋪初十日羅提軍至永州各路兵亦漸集趙金龍欲竄入常寧併趙福才之衆北擾衡州而趙福才已在羅家橋被殲餘賊匿

聚黃峒金龍固未之知也屢攻桂陽之排前墟上下白水洞與官兵相持十餘日戰甚力趙文鳳復據楊家鋪均距黃峒不遠督府以賊勢犄角牽制官軍若急攻必竄逸四出轉分兵力常寧北面已有重兵密檄桂陽守將但設虛聲旁擊羅提軍由新田南路偪之使聚爲一鼓殲擒計各賊聞我兵已進新田果北合黃峒賊同竄踞羊泉二十九日提軍至獠頭饗軍食畢卽進前隊甫行數里提軍復撤回獠頭時賊設伏道旁欲出不意刼我軍旣見未至又值注雨乃退去提軍偵知北路兵將合揮兵疾進夜半畢至賊數

驅衆衝突我兵冒雨力戰連四晝夜殲其多人賊不能支始退匿羊泉市中羊泉居四山閒平疇十餘里溪水貫之邨市臨溪延袤數里墻壁皆甃石砌築以防溪漲故市外復疊石爲垣如堅城賊據之穴垣出槍銃我兵不覺多爲中傷乃持攜牌進擊提軍下令先登者賞不次士皆奮昇攻具薄垣躍而上前者被創墜而繼進不絕火其屋數十間殺數百人賊勢愈蹙圖潰走每夜深雨黑輒犯陣圍之密不得出一日趙文鳳領十餘賊詣營乞降羅提軍佯許之令繳槍械獻首逆各賊具結去蓋欲懈我兵心乘間竄逸也

初九日羅提軍督兵進攻余提軍亦領黔兵至軍策應益衆槍礮疊發火具並舉一時市房盡然我兵冒煙燄直入咸奮勇攀登斫門殺賊賊驚譟突出或由牆隙犯火奔逃我兵內外夾擊立殲二千餘人趙金龍改易服飾混羣賊中逸出爲官兵格殺之俘其妻孥並入排新田賊目數十人十九日盧督府亦自永馳往犒師時市房焚燒殆盡惟李氏宅重楹疊宇逐日焚攻至二十四日始盡燬之賊衆尙數千悉斃於火乃班師先是上命禱大司農恩瑚將軍松額往視師至則已奏捷卽駐衡州會籌善後適廣東

連州排獠續受趙逆約潛兵赴援爲我守隘兵截回而資糧器具爲附近邨民竊取因之刦奪仇殺漸蠹動羊泉班師時曾奏畱勁旅二千屯楚粵要隘備協剿五月間有連州朱岡獠趙子清糾衆入楚界揚言爲趙金龍復仇迫脅九冲獠數千犯江華余提軍就駐邊兵圍捕六月八日及之於濠江冲一戰而潰趙子清竄入銀江冲爲官兵所擒六月十九日復有廣西蒼梧縣旱塘獠盤均華以趙金龍已敗亡湖南獠山多曠土集二千餘人前往奪據二十五日至芳林渡廣西祁撫軍填遣兵追及盤均華拒敵敗走匿江

華竹排界山洞經降猺偵報並其妻女皆就獲排猺
見官軍大集亦讐伏縛獻克逆乞降 詔撫之楚

粵猺地悉平

嗚乎蠻患自昔爲然矣然唐以前尙不甚劇以省
民熟戶居內山猺峒丁居外有所捍蔽也自宋熙
崇間拓地之議興各獻款內附請吏於是民與蠻
乃相接多闢徑路采入溪洞通市易漸典鬻田土
僕賃其孥奸猾牟利百計相欺詐蠻性慙直輒忿
起仇殺逸囚逋盜乘隙扇誘而寇亂迭起每撫蠻
以制蠻元明因之設諸土司溪洞有警動徵其兵

一二十萬土兵習地利耐瘴毒與蠻共其所長此
韓雍王守仁所以奏績也 國朝雍正初沿邊土
民苦土司暴斂爭赴愬願爲 王人時 國家方
經畧西南夷疆臣亦以爲請乃相繼削土改置流
官土民不啻出水火而登衽席郡縣旣治諸蠻亦
多帖服藩籬雖撤而法禁則纖悉無遺久之邊吏
習於晏安防範疏濶偶致蠢動復芟夷而懲創之
醲化漸被孳息日蕃同於齊民矣不謂流言
扇亂小醜鴟張爲禍如是之烈也然而事變多起
於所忽錦田處九冲萬山間近接八排八寨環干

餘里皆獠填壓控制營衛是資而總永州一鎮兵
甲不滿二千錦田防兵又僅十數人器仗楮竄軍
威不揚奸宄玩易啓其戎心倉猝聞變兵難驟集
必待遠地徵發而賊已滋蔓矣且綏懷異類尤貴
拊循獠地跬步皆山稻田絕少墾種諸芋苞穀充
其口食葺茅崖戶僅蔽風雨猥狃其形殆非人類
而性樸魯知敬畏官長得良有司盡心撫治可以
無事乃設丞理之又以僻遠鮮蒞其地民戶偶以
侵山訐訟惟獠是虐獠旣銜恨刻骨而信鬼崇巫
民亦疾之若仇

獠與民有隙將其姓名書之竹木
瘞於土中其人卽死名曰埋禁

勢疑則隙生力侔則亂作何文簡云大抵蠻夷盜賊恒起於訟之不平政之不理苦其吏而不能自達則怨怨則變生揆諸今日可謂明效大驗也朱岡蒼梧八排各獠氣類相同先後附響以剿以撫始獲肅清或鑒成憲度時宜議興議革以善其後然而進考已事成法具在如熙寧閒詔曰頃湖廣諸蠻近漢者無所統壹因其請吏量置城邑撫治紹興間全州守臣言本州密邇溪峒平居失於防閑馴致其亂宜徙閒地巡檢兵及分遣士卒屯諸溪谷山徑嘉泰中湖南守臣言制馭溪峒宜擇素

有知勇爲獠所信服者立爲酋長隆興初廷臣言
湖南州縣多鄰溪峒省民往往交通獠人擅自易
田或詐匿其產避科差宜禁之此皆制蠻安邊之
至計也今議者移濤墟同知于錦田改永州通判
理寧桂諸獠符熙寧之制矣移江華遊擊及提標
守備駐錦田增大橋各防兵如紹興之議矣設獠
長獠目獠老等專其鈐束化導之責猶嘉泰之遺
意也獠田準苗疆例禁與民交產又隆興之區畫
也他如懲邪術禁兵器察緝漢奸議有司疏縱之
罰則皆昔所未及者可謂備矣而其要惟在理獠

得人則獠狁可革杜預曰法行則人從法法敗則
法從人易本義曰先庚三日丁也後庚三日癸也
丁所以丁寧於其變之前癸所以揆度於其變之
後審是則擇賢能而圖綏輯不益懍然於設險之
道慎固之義也哉

八排兵事考

猺之居八排自南宋紹興間始入排之用兵自明嘉
靖間始初連有仕於粵西者挈猺僕十餘人歸使墾
州南黃地源山中山高六十里縱橫百餘里峯巒複
疊巉刻阻深羣猺環山麓每一聚落曰一排初分八

排曰軍寮馬箭里入峒大掌嶺火燒坪爲內五排曰
行祥油嶺橫坑爲外三排久益繁息延及今復有小
排一百三十有一地險物衆出爲民患嘉靖二十五
年因擾邊征之旋議撫獸心未革未幾復亂天啓二
年連山知縣楊懋忠請剿之叅將趙文督兵入有老
猺數十人跪馬前垂涕乞撫文信之不設備夜半賊
以虎皮蒙牛犢驅入營官軍大亂猺乘之一營盡覆
監軍道某佯撫之以緩其暴密請總督檄都司蔡一
申率銳師啣枚夜入踞平猺嶺之險馬箭各排不能
救一申用火箭射入軍寮焚其巢分兵屯白石嶺歇

涼整爲犄角示必剿軍寮賊潛奔油嶺一申率勅卒
裹糧持鋤取間道夜薄油嶺黎明成三大營於林時
洞賊大駭乞命一申勒獻首賊斬之始予撫崇禎五
年復刦民村逼州城三里許吏目吳中選會守備梁
棟輔追捕之及於邊井塘爲賊所殺總督熊文燦議
剿之而未果自是益披猖猺頭李大面者稱雄各部
自以爲槃瓠後遂號盤古檄民村徵租稅曰猺糧某
排轄某邨各畫封界索花紅酒米民大苦之十三年
廣西賊犯連山排猺應之復潛結臨藍高獠柴獠諸
賊由是楚粵之交郡邑騷然一月十三變遂攻州城

州牧王立準率千總黎樹績禦之飛書告急總督沈
猶龍令簽事道魏章監都司蔡坤守備馬文滔軍往
援壁於金相塘賊大至圍坤營兩晝夜勺水不得入
坤無策諭賊解圍卽退兵衣甲火藥盡予之僅以身
免而以兵單賊眾聞上臺猶龍乃奏徵江楚閩粵六
鎮兵分道并進號十萬西自大拱橋東迄大盆嶺營
壘星羅而六總兵以客故不盡乘猶龍節制各乘便
利賊乘高望之盡悉其進退整懈軍寮馬箭賊遂併
力攻閩鎮陳鵬營大戰於蕨岡頭日已暮矣俄里八
大掌諸賊從山南橫擊鵬戰死各軍皆潰猶龍乃城

茂古峒以塞其衝招義兵命監紀董梅鼎守之名咸
寧堡前立墟市民賴以無恐值明季天下大亂猺益
肆沿及國初未盡向化順治八年流賊馬寶入連
州誘排猺出山相倚爲暴拆咸寧堡掠民邨無虛日
九年刦下水堡千總唐某率兵追捕伏發死之康熙
元年連陽遊擊武君仕率三百人偵賊石圭陂賊數
千乘夜出刦君仕令堅壁勿與戰且更番飽食天明
大呼突出殺賊賊披靡退入山峒自此不敢出亂稍
戢惟令兵役巡隘道察其動靜賊惡之欲得而甘心
焉一日數猺牽牛負衣被作刦掠歸山狀誘兵役追

捕既深入則起而殲之其兇狡多類此各排惟軍寮最強油嶺里八峒次之有黃邨民素苦軍寮侵暴集壯丁伏山外俟其出狙擊之擒十人獻於縣時縣令朱三才畏盜案盡釋之欲其德已而不爲暴也獠頭房一心易之率其黨益淫殺無忌控訴皆置不問獠難復起四十年士民奔行省請討賊提督殷化行入里八峒駐兵山麓遣副將林芳入排諭以縛獻首賊羣獠悉伏山谷芳縱火燒獠房光四照各排見焚其巢咸怒於是軍寮馬箭之獠從排之下路仰攻大掌火坪之獠從排之上路俯擊峒獠恃外援遂從中路

突出把總陳浦及兵百人皆殲焉芳走入壺蘆田顧
謂其僕曰此絕地必死汝盍去其僕泣不行賊來益
眾僕以身蔽芳彎弓四射當者皆貫脇洞胷矢盡負
芳而死殷化行率總兵劉虎入賊焚林據險以拒化
行度兵寡未能勝畱虎於軍而自回廣州與督撫會
疏以聞命都統松柱等率湖廣兩粵兵討之
四十一年二月師次三江口連營數十里開山通道
三路進剿圍之數月賊大懼乞降乃撫之城三江寨
駐兵二千以副將領之環八排建三十六汛彈壓控
制百餘年來三連之民慶安枕焉道光十一年錦田

猺蠡動潛結排猺應者數百人續去者爲守隘兵截回羣猺行時以山土賤售民戶旣歸無以資生又失其農具遂刼奪仇殺由西路延及東路而中路軍寮復袒惡助患五月李閣部鴻賓至定議剿之分三路進攻軍寮賊誘之深入夜火其營三路兵皆挫失遊擊史鵠謝國榮王珍並歿於陣 命禧將軍等至

連徵黔楚粵西兵將集羣猺惴服縛獻兇逆乞命師臣承 詔撫之八排復定

排猺生深山邃谷僥捷如鳥獸恃險設伏是其所長故不利遠出而官軍亦不利深入然蔡一申之

奪險神速武君仕之堅壁挫銳皆以偏師奏捷而
五省六鎮十萬之兵或無統帥而潰或僅取輸歟
而歸求其出奇制勝以險絕爲功則不易觀兵法
曰兩鼠鬪於穴中將勇者勝是知深谷行軍貴精
練不貴兵多亦地形然耳且賊覘重兵至必絕隘
道塞關險聚穴負嶠雖有良將勁兵無所用其武
從來皆以安撫了局者蓋不欲老師糜餉也夫亂
之所起不起於起之日其所由來者漸也竊謂於
平日宜撫之不必撫之於旣亂於旣亂宜防之不
必防之於平日徒防之適足以擾之將召亂况撫

之卽所以防之可弭亂也而其要則曰防猺如防
猛獸撫猺如撫嬰兒飽之勿飢信之勿欺馴伏之
勿使其奔逸安戢之勿使其仇離庶乎祛民暴寢
邊患節餉而不勞師也。

盾墨卷之二

善化湯縣幼尊纂

壬辰征臺記

嘉義縣在臺灣府北百二十里舊名諸羅乾隆五十一年林逆之變城陷而復全 賜今名以旌之自

是地益闢漳泉及潮嘉人爭趨之曰閩莊粵莊分類械鬪習爲故常道光十二年閏九月兩莊因小忿牽耕牛奸民陳辦流言於市衆疑懼洶洶遷避張丙詹通等皆閩莊巨盜遂乘之作亂二十日攻雙溪口紅山仔牛頭山各粵莊時劉鎮軍廷斌巡境抵彰化督

北路協兵捕之賊又攻毀大墩莆姜崙各莊入佳里興巡檢署殺弓兵多人知府呂志恒署知縣邵用之護遊擊周進龍縣丞朱懋分投捕賊皆狃於平日之械鬪而不虞其爲逆也至先後被害十月初三日遂圍縣城劉鎮軍急往援途中數與賊戰將及城賊復擁衆拒敵又大戰於三坎店周副將承恩及守備李高然余國章皆戰歿劉鎮軍揮兵奮擊得入城是日五接戰士卒皆飢疲故殺傷亦相等當賊犯城時獄囚數百夜舉火應賊幸鎮兵至滅火取死囚百人斬之城內得不亂而城外賊蠡屯蟻聚用皮攜竹梯更

番圍攻鎮軍督兵民日嬰城固守告急文書募死士
潛入內山繞彰化遞省寄郡城者或由海道然亦多
不得達初八日賊復攻鹽水港代理縣事施模守備
張榮森亦遇害初九日鎮軍畱北路兵守城自率溫
副將兆鳳出南門擊賊賊稍卻然道猶梗守備蔡長
青奉檄入援復半道戰歿官兵旣屢失利多遺旗幟
號衣賊得假裝以誤官軍又道旁皆蔗田竹圃綿延
無際官兵慮賊設伏多不敢追賊所至迫莊戶具食
隨驅以行故從者日衆張丙詹通陳辦三首逆分屯
店仔口水堀頭鹽水港各僭偽號封逆黨自軍師將

帥以下僞職數百人復有賊目劉港劉仲黃番婆陳連江七蔡恭侯虎等分屯茅港尾曾文溪等十二處互相聲援漸逼府城而彰化賊黃城府城舊社賊林海鳳山賊許成各糾眾響應淫殺焚掠全臺大震十月二十日陸路馬提軍濟勝率兵由廈門渡鹿耳門登岸攻其南竇鎮軍振彪由蚶江渡鹿港仔登岸攻其北謝副將朝恩由五虎門渡入里全防其入海署閩督魏撫軍元烺遣鳳臬使來會水師陳提軍化成備兵廈門策應 詔以瑚將軍松額爲欽差大臣哈都統郎阿爲叅贊大臣率侍衛巴圖魯等馳驛赴

軍程制軍祖洛至復徵粵浙兩省兵會剿十月二十
入日馬提軍兵抵臺灣府城二十九日竇鎮軍兵入
番仔坑登岸賊衆據茅港尾併力以拒初黃城糾九
莊賊圍攻斗六門守備馬步衢力禦之賊退而復集
十一月初三日賊大至用牛車數十實草塗泥漿蔽
以進鎗礮皆不能洞護都司許荆山見事急領兵破
柵走線民陳馬等以步衢素勤明得士心諷其去步
衢不聽與縣丞方振聲署千總陳玉成矢死守已而
知不能禦令家屬避賊時惟步衢無親隨而振聲妻
張氏玉成妻唐氏皆願殉難振聲有庶子纔五歲乃

命其母同一雇媼挈之乘居民紛出雜遝遂同匿蕉林署中人爭出走方之客沈志勇者毅然獨畱而志勇于聯輝復願與父同生死於是方之雇僕江承惠曾大祥邱新許廚皆願同死馬步衢等急草文書預列諸殉難人姓名加鈐記強陳繼昌易服潛赴劉鎮軍處投遞部署甫畢而賊已奪柵入步衢等恐火藥爲賊所得然之欲自戕皆以藥少不死持刀巷戰各及數人力竭爲賊所執十一人均遇害而馬步衢方振聲張氏唐氏四人均因忿激罵賊被割鼻刺舌其死爲尤烈云陳繼昌逃出投劉鎮軍達其文書自團

鄉兵殺賊獲黃城逆黨江賓賴來官兵後亦擒黃城同至斗六門磔之當賊圍攻時劉鎮軍偵知內地兵已至募士人效賊裝告急于馬提軍促北路兵往援以道梗輾轉紆迴故十一人終及於難十一月初五日馬提軍率兵抵茅港尾賊來拒敗之初八初十兩戰皆捷十二日賊復據鐵線橋設險以拒十八日我兵分三道進戰奪其險又追敗之於灣裏溪溺死者無算二十日竇鎮軍自彰化入嘉義縣城時賊悉衆南犯呼譟動原野馬提軍堅壁以待覘賊漸疲揮兵突出用子母礮轟擊翼以烏鎗連環進步順風擲火

彈入賊陣賊驚潰自相蹈藉我兵乘之擒斬甚衆夜半復焚其新營埔各賊寮次晨分道進攻賊望風披靡斬馘不可勝計餘賊奔潰賊首詹通著黃桂佩僞印衆擁之疾走官兵縱馬追至安溪寮適有鄉兵截其前遂擒之賊旣大敗無所得食漸解散或數十人數百人竄伏內山馬提軍移營鹽水港竄鎮軍亦引兵來會遣將安撫店仔口各莊於是張丙各賊目均次第就擒惟舊社鳳山賊尙合擾二喃溝等處乃畱寶鎮軍守嘉義劉鎮軍守彰化馬提軍仍領兵南下督謝副將等擊林海許成斬之北路兵亦獲陳辦臺

灣平

嘉義之變不旬日警報至粵遣兵赴南澳防堵策
應羽書駱驛故得備其始末而爲此記然傳聞龐
必一事而兩證之取其同者否則仍闕疑焉如斗
六門馬方諸君死事之烈則以 欽使會疏請

卹之文彰著人口故序次尤詳嗚呼忠孝義烈萃
於一時諸君素所樹立可想矣用能以大義相激
發各盡於倫紀之間下至僕夫傭保皆以身殉爲
難能也且倉皇之頃草文書緘封鈐印使諸人姓
名不同泯於冷煙荒草卽以安其死難之心而毋

或苟免者處事精審不亂一若平日可謂從容就義者矣或謂嘉義爲全臺適中地宜移郡城處重兵以居中御外昔林逆之亂必欲陷之以通道南犯故攻之最力今賊旣圍城則南北軍報不相聞非其明驗歟然此專就地勢論之而未籌夫緩急之際也何也臺灣孤懸重洋之中惟恃澎湖諸島爲之聲援必郡城緊接鹿耳門則諸島之聲息可通內地之兵餉無阻蓋臺灣門戶惟鹿耳門能通大舟若嘉義四面平原無險可扼又距海口最遠緩急旣不足恃形勢因之亦輕則移置郡城未可

輕議也或又謂臺灣宜防山而不必防海者以土番爲足患且朱林各逆多起於山也然蔡驚朱瀆寇艇數百一旦擊汰而來攻城掠野不又曉然於海之當防有更急於山者乎總之臺之名亂起於流民之多流民之多由於土地之廣然地利有盡來者無窮昔患地廣今又患民稠矣昔之亂以富而無教者多今之亂又以貧而無業者衆矣斯患也豈獨臺郡爲然哉

臺灣內附考

臺灣相傳爲古毘舍耶國在福建東南大海中西界

於漳南隣於粵北與閩安相值其水道則東連日本
朝鮮南接琉球呂宋暹羅噶囉吧荷蘭諸國幅輳南
北約三千餘里東西踰六百里番漢雜處其番族聚
居之所曰社合臺灣之社有三百六十餘處其地形
似彎弓由中而入一望平原層巒聳翠樹木蓊茂外
有沙隄名鯤身自大鯤身至七鯤身止起伏相生狀
如龍蛇復有鹿耳門鹿仔港爲之門戶大線頭海翁
窟爲之外障又與澎湖三十六嶼相爲犄角捍衛東
南浚海要疆而昔之志外域者闕焉明中葉司禮監
王三保隨兵船下西洋遭颶風至始知其地嘉靖四

十二年海寇林道乾作亂都督俞大猷追剿及於澎湖道乾遁入臺灣大猷不敢逼畱偏師駐澎湖時哨鹿耳門外徐俟其敝道乾復遁占城澎湖駐師亦罷天啟元年日本甲螺即頭目也顏思齊引倭會歸一王屯臺灣始建安平鎮城於北線尾搭寮經商閩人鄭芝龍附之盜賊出沒其間爲沿海之患崇禎元年芝龍就撫以其地僦荷蘭紅毛夷居之而澎湖本屬同安縣後以地居海中人民散處催科所不能及乃議棄之亦爲紅毛所據屢出犯漳泉邊境天啟四年巡撫南居益擒賊帥十二人澎湖之寇始熄其據臺灣者

自若也荷蘭人善火器其居臺灣以夾板船爲援戰

雖兵不滿千南北土酋咸畏之又建赤嵌城以居順

治九年日本甲螺郭懷一謀逐荷蘭人事覺懷一被

殺於歐汪

在今鳳山縣界

初唐藩稱號時授鄭成功招討大

將軍命募兵海上大兵度仙霞其父芝龍以閩降

成功不從據廈門金門諸島後自江南敗歸頓軍廈

門適日本甲螺何斌與荷蘭人有隙誘成功進取臺

灣由澎湖而東有島俗呼鐵門限以其有吸鐵石焉

舟至則膠至是島中人見有王衣冠者乘巨鯢時往

來衝突踰月而鐵石盡成功舟適至及抵鹿耳門詰

屈迴旋沙浮水淺忽潮漲十餘丈巨艦縱橫畢濟遂
克之荷蘭人退保安平鎮城堅閉不出成功力攻不
克乃告之曰此地本先人故物我欲得之金帛悉以
歸汝荷蘭人乃攜貲去成功遂以赤嵌城爲承天府
改土城爲安平鎮總名曰東都立府尹及天興萬年
二縣康熙元年成功死其子經居鷺江卽今廈門僞提督
馬信立成功弟世襲改號護理經攻逐之世襲渡海
來歸經改東都曰東甯省改縣曰州設安撫司三南
北路澎湖各一經復至鷺江委翁天祐爲轉運使興
市肆建祠廟招納海濱流民眷口以實之遊鯨入犯

飄忽南北沿海軍吏苦於奔命 廷議徙民內地使
寇無所掠食勢將自困遂徙粵閩江浙山東鎮戍之
在界外者連歲遣官巡閱邊海諸郡禁民私出採捕
寇果絀十三年閩藩耿精忠反脅經同叛沿海郡縣
皆陷經遂游居漳泉精忠爲所偪撤建昌諸路兵自
衛 大兵乘之進取十五年十月精忠降 命還

其爵率所部征海寇自效經使僞將劉國軒拒廈門
以拒十六年經棄漳州遁官兵遂復海澄等十州十
七年都統穆赫林與劉國軒戰於祖山頭官兵敗績
退保海澄六月國軒陷海澄署前鋒統領幸福戰死

都統穆赫林提督段應舉皆自縊國軒旣陷海澄乘勝取長泰同安進圍泉州再逼漳州兵號十萬壁於龍虎吳公兩山時城中兵少總督姚啟聖以五蠟丸檄他鎮兵來援不至一日乘大霧率精兵五千突出呼聲震天國軒兵不辨眾寡自相踣藉陣遂亂自辰至酉斬首四千生擒千五百人國軒敗走泉州解圍收復長泰同安等處進攻海澄海澄者濱海地也峻而險寇據之築塹高數丈排列艚艖守金門諸島密若布棋相持一年不決啟聖用漳人黃性震策以寇勢浩大盤結非離散其黨羽陰亂其腹心未易猝圖

於是建立修來館以收納歸誠將士來降者無真僞
胥善待之得海上間諜悉不殺厚賜之恣其往來卽
用以偵海上事由是寇黨自相疑貳來歸者日益衆
復設水師提督練水戰分遣勅兵擾其餉道寇漸乏
食十九年提督萬正色破鄭經於海壇僞將朱天貴
自海壇遁正色敗之於平海崇武諸嶼進取玉洲僞
將劉國軒走廈門僞總兵蘇堪迎降遂復玉洲石馬
水陸兵進攻海澄克之復分兵攻陳洲馬洲灣腰山
觀音山展旗等十九寨皆敗之進擊朱天貴於廈門
天貴潰走遂取金門經遣國軒調殘兵守澎湖派殷

戶出糧抽壯民爲兵人心益離經以朱天貴失廈門
責之天貴懼遂來降寇勢愈蹙二十年經自海澄歸
預立其庶子克壑於洲仔尾築遊觀之所退閑其閒
未幾死衆憚克壑嚴迫之死馮錫苑等遂奉經次子
克塽嗣啟聖偵知之用間諜陰結傅爲霖爲內應事
洩爲霖遇害二十一年啟聖等奏鄭經已死子少國
內亂請乘時進討因授施琅水師提督會總督統師
進取澎臺琅本唐藩舊將後從鄭氏爲左先鋒與成
功有隙來降拜靖海將軍成功收其父及一弟殺之
二十二年啟聖等帥舟師自銅山抵澎湖前鋒遊擊

藍理與僞將會遂戰大破之連克虎井桶盤諸嶼惟澎湖未下啟聖舟停入罩灣琅乘小艇暗渡海中遙見媽祖臺各嶼礮城十六座營壘星羅環繞三十餘里琅遂決策分兵進剿六月二十二日誓師遣總兵吳英陳龍陳昌帥左師入鷄籠山遣總兵朱天貴林賢楊嘉瑞叅將羅士珍帥右師入牛心澳琅自居中權分爲入陣旌旗蔽空舳艫相接自辰至申戮力夾攻擊沉煩船八隻燒烏船二十六隻遂克澎湖國軒遁走我師尾之至鹿耳門門窄水淺琅舟不得上啟聖禱於天妃廟明日大戰礮發水驟長一丈舟並行

如鳥張翼而上窮追至西嶼頭七月克塽以臺灣降

明宗室寧靜王朱術桂向依鄭氏城
破冠帶佩印綬自縊有姬五人同殉

詔以鄭克

塽及成功子璉等六人克塽弟克舉等九人僞武平

侯劉國軒等子弟赴京師隸漢軍旗下於其地設臺

灣府統臺灣鳳山諸羅

即今嘉義

三縣隸福建布政司

雍正

元年增設彰化縣
及北淡水同知

唐桂二王以阽危閏位等之宋之昞曷實不成其

爲國鄭成功雖授爵閩邸竄伏臺灣尤不足與當

日殉節諸賢相比數惟伏讀

高廟御批通

鑒輯覽凡 國史館於二王書僞者概令更正改

書稱號其諸臣仍書所授原官并一體易名

如天之度教忠之典仁至義盡矣故紀述閩粵遺事者皆無所忌諱不沒其實如鄭氏者考其始居廈門時卽奉淮王爲監國繼據臺灣明宗室多避地其閒成功待之盡禮每決大事必坐宗藩於上示不敢專永明立於粵及竄雲南入緬甸數遣使朝貢拜延平王之封藏其印稱招討終其身傳子及孫歷三十八年歸命時其紀年以永歷未改也雖自忘螳臂曾抗王師而崎嶇鯨波其心不貳君子有以悲其志矣方國家弔伐之初區區孤

島亦度外置之而鄭經席父餘業內任陳永華外倚劉國軒收拾敗亡偷息荒澳邊疆之民稍稍安輯矣乃經狂悖輒助閩逆之虐以速其敗嗟乎臺民亦望治久矣故修來館闢而俊傑歸誠密札偶殺而爭爲內應水師皆用土兵與寇共其所長施靖海仇不戴天敵愾益奮一戰而俘其人民化從古聲教未及之地爲戶口貢賦之所海濱郡縣從此永銷烽燧不其懿歟然臺灣本番土一屯於日本再攘於荷蘭繼爲鄭氏所據淫巫之風澆陵之習雖大化旁流驟難盡革則旣富而教又不

當與諸戎固圉並重也哉

盾墨卷之三

善化湯彞幼尊纂

粵海捕盜記

歲癸巳大司馬盧公以粵多盜檄有司捕之舉其勤者黜其惰者人心咸奮接於山迹於川得千三百有奇餘則逸而之海益聚亡命刦奪商漁公之檄愈嚴舉勤黜惰愈急有司捕之亦愈力盜復逸越南海上有司私相謂曰如是庶可以已乎而公不之許咨越南長曾我舟師捕之必盡獲迺止冬十一月盜方遊奕龍門七十二逕其間島嶼斷續礁險水惡訶知我

師至卽遁去窮冬海上颭颭時作舟師寄泊荒澳數散而復集歷旬餘始與盜遇圍而蹙之戰良久沉三船擒數十人忽東北風起盜舉手相賀揚帆潰圍走不百里值越南師船於白龍尾復鬪越南兵用火丸燒其帆風浪顛簸盜船撞暗礁膠不得移迺大譁爭投海越南兵躍登其船殪其渠魁我師乃旋或曰盜起於內而逸於外不盡翦則其始旣恃外得亡遁而其繼將藉內爲囊橐如鰕蛇之相附而山而川而海內外皆棘道矣如公之督有司有司之奉檄將事可謂盡力也已然而舟師涉千里歷旬餘艱與盜相值

何也曰以舂艘之巍峩軍容之壯盛旌旗靡目笳鼓沸耳謂之逐盜可也謂之捕盜不可也或曰捕盜將何如曰雇商船募蠶戶操舟匿其官軍拚息其旗鼓盜至又佯爲引避以誘其來盜見商船如飢鷹之掠食我伺盜船如狙公之發伏起而擒之靡不如意然而謂之捕盜可也謂之弭盜不可也或曰弭盜將何如曰是有龔渤海傳在奚侯鄙談

海寇考

海上自晉末恩循相繼倡亂劉裕從海道襲其番禺循遂敗亡此後海警無聞而防禦未懈元末方張竊

據旁海郡縣其黨敗後多逸而之海明洪武初元稍
稍寇竊嘉靖中邊備廢弛奸民逸囚伺隙勾引倭患
復起又有許棟王直劉香老林道乾鄭芝龍等與倭
相爲表裏數寢而復作至遷民內地棄島澳爲荆榛
故海氛惟明爲最烈防海之制亦惟明爲最詳 國
初鄭成功據金厦諸島數入寇其子經復乘耿逆叛
閩陷沿海郡縣征之十餘年始略定臺灣自是海濱
解嚴烽煙不作聞有蜚漁什伍糾結伺掠商賈然無
聯踪拒敵官軍者自乾隆已酉安南阮氏篡黎困於
兵革國用匱乏巨賊陳天保莫觀輔建採辦之名招

致亡命崇其官爵資以兵糧使劫掠充餉夷艇數百
直犯粵閩江浙則有烏石二烏石大總兵保東海八
阿婆帶大礮腹諸賊目而四總兵最猖獗閩粵土盜
因之蠭起則有蔡騫朱漬鄭一張保金姑養等及諸
有名目無名目大小亦數百舶交海中於是土盜誘
夷艇以深入夷艇倚土盜爲聲援幾蔓延不可制當
時主兵者獨急夷艇而閩粵將帥中又獨李忠毅公
長庚辦賊最力 上遂授忠毅總統閩浙舟師
嘉慶五年夏夷艇大入六月中忠毅與黃巖鎮會師台
州之松門颶風作覆賊舟幾盡官軍乘風擊之俘斬

六千人四總兵溺死者三獲其一僞侯倫貴利磔之
我師亦頗亡失奉 旨以總兵勅印示安南王阮

光纘光纘言但令總兵巡海不慮入浙爲盜上表謝
罪自是艇患稍紓光纘旋失國新藩阮福映曉大義
逐諸奸匪勾結窩頓者皆芟夷舊阮黨畱粵洋不敢
歸數登岸掠食而閩洋蔡騫橫甚其舶高出官軍所
駕之米艇仰攻非便又於四面重疊張牛皮漁網礮
彈不得入忠毅建議限商船樑頭丈尺使賊無大船
可刦又出巧思製火攻船先出收撫其脅從者而後
擊之與賊大小百餘戰所擒殲數千人沉燒其船數

百奪其船數十一躡之於漁山一蹙之於臺灣鹿耳門一扼之粵洋大星嶼皆幾獲而復脫最後追之粵黑水洋騫僅存二舟而忠毅戰歿騫旋亦敗死張保等皆就撫海寇悉平蓋二十餘年督撫大吏經營措置諸將帥追逐風濤茫渺中艱危險阻視陸師有過之無弗及也按海道南連交趾歷廣東福建江浙山東直隸兩京北接高麗計一萬五千餘里巨浸稽天賊蹤靡定旣無邀擊之地所恃惟得順風然我乘風而追賊亦乘風而遁雖遠徒勞無已則探其止泊圍而蹙之或可奏功而賊謀最多官軍未至賊已起碇

避去欲求攻其不備百無一二然則賊終不可得乎
曰是亦多術矣而絕其刼奪之資禁其接濟之路爲
最要是二者又必因哨守兼行而後克濟也當明初
海寇初作議者謂使是時中國潛爲邊備而聽其自
去來海上不問一如宋元以前時亦不至大爲患故
後人復有守內洋捐外洋之論謂我之商漁許於內
洋採捕禁其越外洋其盜船聽其外洋往來堵其入
內洋舟師扼要守之循環哨之以聯絡策應寇至併
力禦敵去則縱其所之而勿追如是則刼奪商漁接
濟水米皆可禁絕而賊不薄岸賊無所消糴汲又窮

勢將自困惟寇掠在外接濟消賊皆起於內則察蜚
戶漁艇杜奸闌出入吾固知其更有急於圖寇者矣
。越南內訌防邊記

自黎氏失安南阮光平立於富春而新阮復代之改
賜越南之號今五十年矣黎氏舊臣猶據守宣光
興化時謀恢復道光癸巳秋有農文雲者自稱平南
大將軍傳檄起義阮兵拒之於達零墟其地去粵之
歸順州邊界二十里耳因之增戍守謹斥堠阮農恭
順交諭夷兵勿犯我境而軍行進止則數數相聞其
後寢而復作阮氏徵紅毛兵禦之

越南人稱占
城爲紅毛國相持

數月甲午夏紅毛兵因酷暑斃退遂爲農兵所乘襲破牧馬正銳意前進越南義勇頭目黃廷芝出不意夜刦之農兵退入牧馬城中待接濟黃廷芝得以其暇潛集上琅下琅廣淵三州兵二千過住保機援兵使不得逞俄阮兵大集夾攻牧馬農文雲因糧乏外援不至遂潰走當農兵起時我滇粵疆臣俱以入告且陳屯兵益戍狀無他議也有言於督府曰阮者國之外臣爲四夷主同其患難宜助阮又一人曰戊申之役爲存黎也農爲黎守當如武文淵故事宜旌農夫阮非伐罪奚助之農不得謂之復仇又何旌焉

是二說者皆於義無當也徒以熒聽者之耳而邊釁有不恤焉督府卒皆斥去邊境亦解嚴蓋以荒夷瘴癘不足勞我師徒況阮農構亂亦猶黎莫相殘強弱迭遭無所等差乘其相持而擅田父之功陋亦甚矣成化時閩直倖功數從中問所司征安南故籍劉忠宣匿不與事迺寢隆慶時莫衰黎橫莫氏遣使告急廣督陳大科言交夷易姓如奕棋不當以彼之順逆爲順逆而當以彼之順我逆我爲順逆於是以黎維潭爲安南都統使予莫敬用以高平令而亂亦定蓋自昔之撫藩國也必衆建以分其力而馭蠻夷也必

兩存以弱其勢此防抵隙彼慮乘敝則自守嚴而內附堅矣參伍於前事知中土制夷之要道在此不在彼也

附農文雲檄文云宣義道平南節制大將軍諭天下檄文蓋聞王者乘時舉事大興問罪之師丈夫遇會逢機早決投明之舉識時務在乎俊傑除暴虐濟以寬仁我國家偶值中微久罹厄運慨自西山煽亂腥膻五十年有異之山河更遭阮賊逞凶塗炭十三道無依之蒼赤急令暴條益深蛇虺橫徵重歛殆甚狼貪黔首民更苦於秦苛賴尾象難

堪於桀虐丁五年一閔重之以兵卒徭夫站驛力
已窮而徵役不休財十室九空加之以課稅蠶絲
麻根利盡刮而誅求不已甚至抑藩臣改鎮城事
機之失而彼不知與夫立社稷開籍田義理之非
而彼不識彼惡旣彰無道我師宜奮有征本爵黎
氏世臣周藩薄服鱗翼遙允攀附一方揮應義之
旗旅成大奮經營三尺勵殲仇之劍蓋支大厦固
非一木而定太平夫豈一夫脊維南國雄豪北城
奇傑遐邇深山大澤各聞風而自至自來始終義
士忠臣咸應響而獻謀獻力先機莫失後會有期

月
如今正叶一心。此後期蘇萬姓步騎水陸並進。誓清烏徼之塵。東西南北於征盡復。龍城之地會見。關河蕩定。海宇廓清。植奇木於中天。六七月應太平之讖。完功臣於爵土。億萬年垂帶礪之盟。檄到奉行。各宜自勵。此檄。癸巳年九月屬宣義道奉差左勝旅副管張官承抄貼挂。

越南建置疆域考

越南唐虞之南交。周爲越裳秦象郡。漢初趙陀據之。武帝平南越。置交趾九真日南三郡。建安中改爲交州。置牧梁大同中李賁據之。稱南越帝。尋滅唐置都。

護府復改安南皆內屬也五代時土人曲承美據之
已而爲南漢所併宋初丁部領有其地自號大瞿越
國旋封交趾郡王自是與雲南共棄之然而未立國
也部領傳子璿黎桓篡之桓傳子龍鋌李公蘊篡之
天禧元年封公蘊爲南平王淳熙元年封李天祚爲
安南國王安南自是始立國李入傳嗣絕爲其壻陳
日煚所有元攻下之封其子先曷爲交趾郡王終元
世貢不絕明初遣使朝貢仍封爲安南國王歷十二
傳爲胡季犁所篡號其國曰大虞傳子漢蒼永樂元
年命張輔等二十五將軍討平之郡縣其地而陳氏

之裔陳顥自立號大越明獲之陳季擴復立尋亦亡
於明而范玉復立自稱羅平王十年中寇亂相繼終
叛於黎利仍棄爲夷利十傳爲莫登庸所篡莫五傳
復爲黎氏所襲莫氏遺孽竄居高平先後款關內附
乃削其王封授黎維潭安南都統使予莫敬用以高
平令 國朝定鼎莫敬耀先納款 詔封爲安南
都統使黎維禔聞莫氏已附始於康熙二年貢方物
因封維禔子維禔爲安南國王黎氏歷二百餘年因
權臣擅國而有阮惠之變乾隆戊申遂大亂國主出
亡妃媵大臣內奔投於粵西 命滇粵兩師會討

是年冬十月二十八日督師孫公士毅率廣西提督
許世亨出鎮南關由諒山進滇督富公綱率提督烏
大經出馬白關抵宣光爲聲援十一月十三日粵師
敗賊於壽昌十五日抵市球賊阻富良江進攻之賊
大潰二十日入黎京定嗣孫黎維祁位己酉正月二
十一日班師而粵師遇伏多所亡失土盜復所在蠶
起阮光平據守富春因其請撫遂建之以安邊徼光
平傳子光纘旋失國阮福映代之福映明大義除舊
阮諸亂黨與交人更新請 賜號南越 廷議以
嶽趙陀竊據南海蒼梧鬱林合浦象郡各地稱南越

今南海等地久爲中國郡縣而安南疆域實止秦時
象郡一隅未便仍以南越國稱乃 賜號越南越
南之爲國東臨海南接占城西連雲南老撾北抵廣
西憑祥州衡二千八百里縱一千八百里畫國中爲
十三道設三十八府五十六州一百十八縣山以佛
蹟勾漏繖圓爲大水稱富良宣光二江富良尤壯濶
隔岸不辨人馬舊都黎京倚富良之險今都富春濱
海出順化港直達欽州故其水陸數道通中國一由
廣西南寧府出鎮南關至文淵州經諒山長慶入黎
城一由雲南蒙自縣出猛烈關經宣光鎮入黎城或

出開化馬白關經安邊大蠻州抵宣光是二道明張
輔二十五將軍及乾隆戊申我滇粵兩師進討所從
出也其水道一由廣西龍州出平而水口兩關一自
廣東欽州天津駟出海經貓兒港涌淪佛陶抵富春
出鎮南關二百里有畏天關巉刻險峻一徑盤空僅
容兩騎下臨深谿稱第一要害郡縣無城郭皆樹柵
爲衛笏竹藩其外官署神廟始覆瓦民居皆編簷爲
篷削竹爲棟山田磽确有稻無麥一縣民賦僅足餉
一縣之兵少積儲鮮地利惟高平有金礦歲徵稅才
二百兩都龍銅廠稅尤薄昔所稱產金珠珊瑚丹砂

肉桂異香蘇合油之屬今皆衰耗官制彷彿有明典
兵用宦寺出陣以象爲前驅兵纏五色布於首綴薄
鐵皮數片爲甲無韞履兵行不齎糧民間共餉之其
民數當張輔平定時計戶三百一十二萬五千今又
四百餘年自益蕃息向稱交愛人倜儻驩演人淳秀
尚文學有華風餘則蠻獠雜居獷悍喜鬪其君長尤
狡獪自宋元以來雖奉貢稱藩然自帝其國中如趙
陀故事云光武時馬援討平徵側徵貳立銅柱於廉
之貼浪都古森峒上今其旁復有二柱則唐時爲馬
總所立也總在南海累年清廉不撓夷獠便之特鑄

二柱刻書唐德以繼援迹以此見漢唐以前內之者
視治術朱元以後外之者視控御也故考其興廢道
其山川爲守邊吏士告焉

外域之尙文者近唯高麗越南爲最日本琉球次
之亦以見同文之化漸被者遠也道光十一年

越南賀

萬壽慶節表云越南國王臣阮福皎

稽首頓首謹

上言茲仰見冀階霽瑞華渚呈祥海

籌增而壽豈凝禧山祝協而尊親普慶臣誠歡誠

忭謹奉表稱賀者伏以離明繼照萬方瞻斗極之

輝鼎命永昌

五福衍箕疇之壽和勻遂陞嘉溢炎

郊欽惟

大皇帝陛下道合施生化隆垂拱運

四德而綱維乎是乾健端中正之標宣重光而容

保無疆比親溥懷柔之澤洋溢之聲教攸暨崇盛

之福祉稠膺僊齡晉屆五旬仰椿廕喜天家之有

慶聖誕載臨初度瞻桂影欣壽曜之常明綏將永

裕於嘉釐保佑重申夫景貺臣叨蒙茅昨倍切葵

傾盼闔闔以揚麻恍親玉帛衣裳之盛會歌臺萊

而展忭厯禱山川岡阜之禎祺臣下情無任瞻天
仰聖懽忭頌禱之至另具慶賀儀物並奏事一摺
委陪臣黃文直等赴闕奏進外謹奉表稱賀以
聞其摺子云越南國王臣阮福校稽首頓首謹奏
爲恭遇昌辰虔抒賀摺事本年恭值聖壽五
旬慶節臧艾凝祺純常迪祐仰見大皇帝受
天眷佑申命無疆億萬歲億籌紀茲初度盛治備
福實惟中外臣民之慶歡同普率匪惟下邦臣遙
瞻圖鑑倍切尊親道光十年四月內業經具情咨
明廣西撫臣懇於茲年委員恭賚方物詣京祝
嘏並請示陪臣進關日期等因是年六月內接到
照會公文內敘欽奉大皇帝諭旨內一欵該
國使臣著於來年七月內到京欽此臣莊誦綸
音彌愍葵悃仰雲天之在望冀芹曝之達誠夢寐
鈞韶易勝懽忭謹奉遵照嘉慶八年禮臣准定慶
賀儀例恭委陪臣黃文直等欽遞赴闕拜賀庶
表區區恭順之忱另具慶賀表文上進外謹奏具
事奏聞仰祈聖鑒謹奏謹遣陪臣三員黃
文直張好合潘輝注一欽進慶賀儀物象牙二對
犀角四座土綢土紬土布各百疋其臣文云

越南國王阮爲呈覆事道光十年六月二十三日
接到照會內敘欽奉諭旨小國祝嘏使臣著
於來年七月內到京欽此現經上憲定於來年二
月初十日開關並檄行經過郡邑咨明前途照料
使臣人等按程行走等因小國莊誦之下具見上
憲仰體皇仁懷柔備至經將奉到日期佈覆
茲謹委陪臣黃文宣等賁遞表函方物以開年正
月十三日自國進關靜候啓鑰輒此預先抄錄奏
表二道呈電祈爲審閱轉達再此次小國陪价一
路行走事宜全憑上憲曲爲體顧俾得敏濟公幹
是所切禱也陽月在辰遙惟鈴閣舒和順時納祉
須至呈覆者計開貢物清單照前陪臣三員行人
入員隨人九名

越南元號錄

李賁

天德

一作大德梁大同十
年稱南越帝尋滅

丁部領

太平

宋開寶元年
國號大瞿越

丁璿子部領太平太平興國四年立仍稱

黎桓天福五年太平興國五年興統五應天十二

黎龍鉞子桓應天景德二年立仍稱

黎龍鋌應天景德三年立仍稱景瑞二〇其臣李

李公蘊順天大中祥符二年

李佛瑪子公蘊天成天聖七年通瑞五乾符有道三明

道二天感聖武五崇興大寶五

李日尊子佛瑪龍瑞太平至和元彰聖嘉慶六龍章天

嗣二天貺寶象一神武三

李乾德日尊太寧一作秦寧熙英武昭聖九廣祐七

會豐

九

龍符

八

會祥大慶

九

天符睿武

七

天符慶

壽

一

李陽煥

子日尊

天順

建炎二年○五

天章寶嗣

五

李天祚

子陽煥

紹明

紹興八年○二十三

政隆寶應

十一

天感至

寶

二

李龍翰

子天祚

貞符

淳熙三年○十

天資嘉瑞

十六

天嘉寶祐

三

治平應龍

六

李岳

子龍翰

建嘉

嘉定四年○十三

李佛金

女岳

天彰有道

嘉定十七年立陳煕纂之

陳煕

建中

寶慶元年○七

天應政平

十九元豐

七

陳冕

子與

紹隆

立

寶祐六年

寶符

六

陳吟

子冕

紹寶

至

元十六年

重興

八

陳烱

子吟

興隆

至

元三十年

〇二十一

陳裔

子烱

大慶

延祐元年

〇十開泰

五

陳旺

子裔

開祐

天歷二年

〇十三

陳皞

子裔

紹豐

至

正元年

太治

十一

楊日

禮

陳皞養子

大定

洪武二年

頤廢之而立

陳頤

紹慶

洪武三年

陳暉

弟頤

隆慶

洪武六年

〇四

陳睨

子暉

昌符

洪武十年

〇十一

胡

季

睨之立

頤子

顯

陳頤

光泰

洪武二十一年季
犛弒之立其子焮

陳焮

建新

洪武三十一年
○一○季犛篡

胡季犛

聖元

一作元聖一作天聖○建
文元年國號大虞○一

胡漢蒼

季犛子紹成

一作紹聖○建
文三年○二

開大

四○明滅之
順子頤復立

陳頤

興慶

永樂五年國號大越○二
○明獲之順孫季擴復立

陳季擴

重光

續通考作慶元○永樂七年○
五○亡於明以上見大越史記

范玉

永寧

永樂十五年
稱羅平王

黎利

順天

宣德二
年○六

黎麟

利子紹平

宣德七
年○六大寶三維寧見類
聚考

黎濬

麟子大利

或作太和○正
統七年○十一延寧六

黎琮濬天與一作天與天順三年篡九月國人誅之立濬弟灝

黎灝光順天順三年洪德二十

黎暉灝景統宏治十年○七子

黎敬泰貞宏治十七年○見歷代紀元考明史無

黎誼暉端慶正德元年○四阮种弒之國人誅种立灝孫暉

黎暉洪順正德四年○七陳暉弒之而立

陳暉應天一作天應○正德十一年國號大虞莫登庸討之立灝子諲

黎諲元始正德十二年登庸逐之立其弟應○明史無

黎應統元嘉靖元年登庸○明史無

莫登庸明德嘉靖六年○二

莫方瀛

子登庸

大正

嘉靖九年○嘉靖十九年降於明

黎寧

子諱

元和

嘉靖九年○四

後寧

嘉靖十三年○黎諱國於清華卒子寧嗣登庸攻之

奔占城國人立其弟憲

黎憲

光照

一作光紹○十五○後遂微以上見明史

黎維邦

暉後萬歷間鄭檢所立

黎維潭

邦子萬歷間嗣逐莫氏而中興降於明封為安南都統使

黎維禔

熙國朝康熙間入貢

黎維禔

禔子康熙二年受封為安南國王○以上元號皆無考

黎維禔

禔後景興師乾隆間見錢譜及師範征安南紀略

黎維祁

祁孫昭統○乾隆五十二年立○阮氏篡之

阮光平

乾隆五十四年冊立爲安南國王奉中國正朔無元號下同

阮光纘

光平子嘉慶初嗣旋失國阮福映代之

按陳暲陳睨各名皆與明史異又胡季犛史作黎季犛又宣德時當黎利之亂有一陳暲與正德時陳暲同名葉進卿云交趾君長有二名以僞名事中國此大越史記所以與明史互異也歟。

盾墨卷之三終

盾墨卷之四

善化湯霖幼尊纂

暎咭喇兵船記

西南海國以千百而荷蘭爲大暎咭喇者本荷蘭屬國在歐邏巴西後又據有北亞末利加地稱加那大暎咭喇益富强以兵船火器橫海上竟爲荷蘭勍敵雍正十二年始來通市定制番舶至口先報總督監督委官驗無禁物然後給牌照入至黃浦起銃礮開艙互市其番商居停之所在廣州西郭外重樓濱水所謂十三行是也舶長曰大班次日二班若言事用

文書由總商轉投總督監督既啓封復發出譯以進批荅可否亦發商傳示之黃浦距廣州六十里各貨船得至而兵船則否道光十四年夏有喚咭喇夷官律勞卑者來主舶而同行有兵船二寄碇外洋其貨舶不赴澳請牌照卽入口夷官處省館輒效中國文字作書投督府非故事故不之省而擲還之且諭總商傳語嚴斥之律勞卑桀驁如故又用華文揭榜館前語多誕妄督府以其不循法度下令封貨舶不與通市八月五日二兵船忽乘南風潮漲駛入內洋越過虎門鎮遠沙角橫擋大虎各礮臺直抵黃浦守臺

官兵不能禦乃然空礮以懼之而夷船竟發巨礮實鉛丸損我礮臺人心震怒其船既至黃浦泊入各國貨船間起重物用小艇圍守甚固每船番梢不過數百人入我重地雖犀勁何能爲然彼國散商之居館者約千人各國貨船之在黃浦者約萬人若暗結澳夷則聲援更廣夷情叵測備之宜嚴於是上流用大船十餘每船載大石十萬觔橫沉水底繫以鐵鹿大纜復結木筏水面以阻之集柴薪草束大小船數百集舟師數十兩岸設營柵集士卒數千其戰艦仿懸簾法濕絮褥以禦火器檣楫如林戈矛森列旌旗耀

雲日鉦鼓聲震數十里夷兵大懼請退出不許律勞
卑請給小船下澳不許番商數千人合詞乞命乃許
之蓋玩則懲之服則舍之使畏且懷制夷之道也律
勞卑既出慮歸國以生釁伏法遂仰藥死

市舶考

漢武帝既平南越滅朝鮮中國東南全際大海通外
區舟航譯使獻見貿易興焉於是市舶自建元時始
市舶立官司設結好使於廣州立交易綱首自唐開
元時始禁私物奸人下海自宋崇寧時始禁販易金
銀自淳熙時始禁銅錢下海自端平時始禁運米出

糴自元至元時始年愈久法愈密弊亦愈深於是禁
下番船隻罷提舉司自至大時始令番商止集舶所
不許入城通番者有厲禁自明洪武時始立客綱客
紀以廣人及徽泉等商爲之自嘉靖時始中官黷貨
慮市召寇罷市舶司遷沿海居民自嘉靖時始但禁
日本旋復三市舶西番入居澳門自萬歷時始開南
洋之禁招懷遠人海舶奔轅設監督自 國朝康熙
時始寇盜翦除海波不興番夷向化納賚獻琛一歲
之間來舶一百四舵爲建元以來所無則又自嘉慶
二十年始統而論之疏濶於漢法於唐密於宋元弊

於明季盛於我 大清漢時海島通譯奉貢者稱三十許國蠻夷賈船雖利交易而數年來還無定式也因其來獻設譯長無船司權使也募人齎黃金雜繪入海市明珠璧流離奇物無定地也而一切法禁皆未設至唐則西洋大海中師子諸國皆至有市舶使有嶺南安南互市地舶至有奏報有舶使籍其物納舶脚有進獻之物有軍國之供法制立矣宋於廣州外又置杭明兩州舶司京師置權署令內侍齎勅書金帛招諸番商出海外販易故天聖後象犀珠玉香藥寶貨充牣府庫嘗斥其餘以易金帛芻粟縣官用

度實有助焉講求益詳防維漸密建炎時博買無用之物費國用及虧番商者皆重寘其罪立譏察海舶條法食貨志曰法禁雖嚴奸巧愈密商人貪利而貿遷黠吏受賕而縱釋其弊卒不可禁元監之定抽分之數漏稅之法立雜禁二十一條視宋爲益密明初西海諸國恭順貢使駱驛設駟於廣泉浙三舶司以館之其規模制度駸駸乎開元開寶之盛柰何永樂後而命中官總貨遂恣橫爲商民害擢舉官吏領簿而已馴至嘉靖中因敝已極俄倭禍起言者遂請罷市舶不知當罷者市舶太監非市舶也市舶旣罷邊

海之民日困番舶無所容凶黨構煽奸闖出入私市
益盛寇盜滋起主事唐樞建議請復互市曰通市則
寇轉而爲商市禁則商轉而爲寇通政唐順之曰舶
之爲利也譬如礦封閉礦洞驅逐礦徒是爲上策度
不能閉則國收其利權而操之自上是爲中策不閉
不收利孔洩漏以資奸萌嘯聚其間斯無策矣尙書
鄭曉巡撫林富皆論市舶有四利所以通華夷之情
遷有無之貨收徵稅之利減戍守之費又以禁海賈
抑奸商也卒從其請而仍絕日本貢市 清興荷蘭
首效順遣兵船助討海寇因請貿易康熙二十四年

開海禁設權關四於廣東嶼門福建漳州浙江寧波
江南雲臺山置吏以莅之自是琉球蘇祿呂宋暹羅
大小西洋暎咭喇紅毛諸番畏懷 威德咸攸關

欸貢爭效方物聯舩接檣鱗次海滙以哩吱哆羅連
玻璃異香珍寶來市其互易之物以茶葉大黃茯苓
湖絲爲重外此則陶器糖霜鉛錫惟禁市史書黃金
紋銀制錢鐵紅黃銅硝磺米如宋元故事其稅額四
萬兩贏餘八十五萬五千五百歲課無絀比之唐宋
則倍之視明則無稅璫之蠹政而沿海商民內有耕
桑之獲外有魚鹽蜃蛤之資又以供賦之餘爲轉輸

互易以仰佐 國計上饒而下給自通市以來未有
如斯之盛也夫番土百貨非中國不可缺而中國之
茶藥則爲番土所必需是以遠國商販不避盜賊剽
劫風濤沉溺之險則向化之情與互市之利昭然可
觀矣 朝廷因之示招徠寓懷柔以奠安邊氓慎固
封守又不寶遠物尙奇巧譏其貨賄使利權在上絕
奸豪外交內訶此漢唐汔今所以行之而不可終廢
者蓋亦設險之一道豈惟軍國之供而已哉

。按康熙間開海禁外夷來廣州互市者甚繁見於
一統志職貢圖及海國聞見錄舟車聞見錄郝氏

廣東通志諸書可攷而知然有一至而復至者有
十餘載一至者各島互相吞并名號輒易其詳不
可考矣今來諸國撮其略於後

暎咭喇 本在歐邏巴之西爲紅毛屬國服飾與
荷蘭同後漸富强又據有北亞末利加之地稱加
那大暎咭喇稱歐邏巴之國爲本國雍正十二年
始通市所貿易聯屬之地皆稱港脚來舶甚多

咪喇哩 俗稱花旗屬北亞末利加與加那大暎
咭喇接壤乾隆五十二年始通市近年來舶甚多
幾與暎咭喇相埒其舶較他國差小隨時可至非

如他國必八九月始能進口所以來船較多

噠一名但國

即黃祁其地與荷蘭相對隔一小海喘

噠二國皆與俄羅斯接壤乾隆元年始通市

大呂宋 在佛蘭西之南即意氏班牙乾隆四十八年始通市

呢喇喇 即小呂宋其地宜稻米賤時石值三四錢即昂亦不過一兩風便十日可至澳門

米時哥 呂宋屬國其地多鑄花邊銀錢無物產海舶來粵惟載銀錢而已

咖喇吧 荷蘭所屬地由萬山外羅新州遶陸耐

國後向南行約四日至崑崙山爲安南境又南行約五日爲咖喇吧山名頭峙山又南行二十餘里至海峙山過此爲咖喇吧大山廣袤二百餘里有城郭土產咖噠流連子形似柚而小孟姑生形如柿有核其味清美

味唆喇 佛郎機所轄由咖喇吧屬國曼打拉撒陸路二三日可至舟行遇東北風一日卽至其地乾隆七年始通市

馬塔喇 與小西洋望婆羅麻倫你二國毗連皆沿海長數千里乃回回種類乾隆七年始通市

望喟 小西洋北爲望婆羅國又北麻倫你國又
北少西爲喚咭喇國又北少西爲望喟乃紅毛所
轄有城郭物產殷富風俗淳厚乾隆四年始通市
蘇喇 望喟北舟行三日陸路四五日可至亦紅
毛所轄風俗物產與望喟國同乾隆九年始通市
雙鷹 又名打嚏 奉天主教風俗與西洋同與單鷹國
爲兄弟患難相恤海舶來粵者用白旗上畫一鷹
二頭乾隆四十五年始通市

單鷹 在雙鷹西北風俗相同市舶用白旗畫一
鷹乾隆五十二年始通市

噍 乾隆三年始通市

咩啫哩 乾隆五年始通市

吡喇噤 乾隆十七年始通市

鷹 乾隆五十一年始通市

數間盧 乾隆五十二年始通市

甚波立 嘉慶七年始通市 以上六國皆西洋

紅毛種類也

西洋各島至中國海道

西蕃從歐邏巴各國起程約一年之內皆聚於邊
海春發入大洋從福島之北過夏至線在赤道北

二十三度半踰赤道而南此處北極已沒南極漸高又過冬至線在赤道南二十三度半越大浪山見南極高三十餘度又逆轉冬至線過黑人國老楞佐島夾界中又踰赤道至小西洋南印度卧亞城在赤道北十六度風有順逆大率亦一年之內可抵小西洋至此則海中多島道險窄難行乃換中舶亦乘春月而行抵則意蘭經榜葛刺海從蘇門答臘與滿刺加之中又經新加步峽迤北過占城暹羅界閱三年方抵廣州此從西達中國之路也若從東而來自以西把尼亞地中海過巴爾德

峽至亞墨利加之界此亦有二道或從墨瓦蠟尼
加峽出太平海或從新以西把尼亞界泊舟從陸
路出孛露海過馬路古呂宋等島至大明海以達
廣州然西人多從西而來不由東道其行海晝夜
無停有山島可記者則指山島而行至大洋中常
萬里無山島則用羅經以審方其審方之法全在
海圖量取度數卽知行至某處去某處若干里故
每船中有歷師二人專掌窺測天文晝則測日夜
則測星量取度數以識險易知道里海中夷險不
同太平海極淺亘古至今無太風浪大西洋極深

深十餘里從大西洋至大明海四十五度以南其風常有定候至四十五度以北風色便錯亂不常其尤異者在大明東南一隅常有異風儵忽更二十四向海船任風飄蕩風水又各異道如前爲南風水必北行儵轉爲北風而水勢尙未趨南舟莫適從因至摧破小西洋海潮極高大又極迅急平地頃刻湧數百里海中大舶及魚龍之屬嘗乘潮湧入山中不可出歐邏巴新會蠟利未亞大浪山皆風浪險惡滿刺加海無風而浪又不全海皆然惟里許一處以次起滅海上雖多風獨利未亞海

近爲匿亞之地當赤道下者常苦無風又天氣酷熱舶如至此食物俱壞人易生疾海深不可下碇舶大不能用櫓海水暗流遇潮湧泊淺處則舶多破損北海則半年無日氣候極寒舶入冰海爲堅冰所阻必守至冰解方得去又苦冰山海中冰塊爲風所擊堆疊成山舶觸之卽爲齏粉赤道之下則終歲常熱食物水酒至此色味皆變過之卽復如常海色綠惟東西二紅海色淡紅故以名焉。

澳門西蕃

澳門一名濠鏡隸香山縣其地周六里三面環海

惟前山一徑通出入其南有四山離立海水縱橫
貫之成十字曰十字門今合稱澳門云初明嘉靖
中蕃舶託言舟觸風濤願借濠鏡地暴諸水漬貢
物海道副使汪柏許之結茭舍其間後漸運飢餓
檣櫓爲屋佛郎機人始混入歲輸麀緡五百一十
有五久之遂爲所據至國初已盡易大西洋意
大里亞人汔今二百年孳育蕃息其戶口三千有
奇白主黑奴內刺兵一百五十名其渠目曰兵頭
一掌兵理事官一司庫判事官一司獄而總領於
蕃僧一人其國有二王曰教化曰治世治世奉教

化之命貿易夷人皆治世類居澳蕃僧則教化類也其慧者習天官家言精製造國中敬信天主邪蘇敎蕃僧出入張蓋樹旛男女見之跪捧足俟過乃起其女尼夷人敬奉尤甚於僧一女爲尼一家皆爲佛眷人羅重辟得尼片紙立宥之其在澳者別立寺旣入則終身不出戒律頗嚴夷人所役之黑鬼奴卽唐時所謂崑崙奴明時名烏鬼生海外諸島通體如漆夷人雜坐以黑奴進食食餘傾之一器如馬槽黑奴男女以手持食夷屋多層樓處黑鬼於下夷人語言文字必譯而後通其書右行

西蕃各國通行之字相傳爲馬邏可國所遺用三十六字母諧聲比附以成字各國大略相同謂之拉丁字亦謂拉體納字呼官曰滿的歷人曰阿壘先生曰羨擁坐曰三答走曰阿皆不走曰儂皆飲酒曰白白迷濃茶曰白白茶飯曰穀米那蘇銀曰白得架銅錢曰薩別架相打曰蘇的歷相詈曰堅都嚕哈非什生哀乃然西蕃旣與粵人錯居數百年多能作華語不止會遊京師之蕃僧也粵人亦多能解蕃語有不待於通譯者旣暱處相狎習故民蕃恒構怨法令有不盡行自明以來患之屢刊

禁碑示約束防制不稍懈然卒無他虞者以其距
本國九萬里海道險遠必數年來還自閉唐人廟
禁天主教其國主不輸財至澳澳夷益貧額船二
十五桅今以貲匱半停泊荒嶼斷港閒又以樓下
屋僦華民仰其租息故昔號富強而今稍貧弱矣
其前山建閘駐兵以扼其吭如澳中有一事閉其關
閘絕水米卽足制其生命夷人舍航海別無出路
惟德威並濟操縱有宜則邇安遠徠之道在是矣

絕嘆咭喇互市論

互市誠中外之利自嘆咭喇假市以售雅片於是外

蕃之利無窮中土之患殆將莫測則互市之通塞又不待智者而後決矣請得而論之聞之紅毛諸蕃相吞并敵弱則攻取敵強則誘之以雅片以疲羸其人而奪其國雅片者彼所恃爲陰謀奇計也噶咭喇亦紅毛之一旣復據有北亞末利加地屬國益多而明雅喇孟買曼打拉撒嗎喇他盎叭哩皆善製雅片於是噶咭喇雄長西蕃而雅片之禍遂曼衍不可制雍正十二年來通貢市時雅片已漸入粵東列藥物籍中未之禁也乾隆間遣使入貢乞於浙江之珠山及天津等處櫟地築室爲互市地 朝廷燭其奸不

之許嘉慶三年雅片之來日多食之者日衆始設禁
十九年復入貢蕃使至國門忽稱疾竟揚帆去比
歲蕃舶數徜徉閩浙江南天津各洋面託言風礁損
舟入口寄碇雖旋驅逐之而雅片之人已無祓每歲
出海銀至數千萬兩外奸內宄主客相糾牢不可破
建言者或謂宜寬之以敵其居奇或謂宜嚴之以絕
其買食咸視爲莫測之隱憂爲之長慮而卻顧也
國家威靈震疊莫不陸讐水慄藐茲暎夷不過假貢
市以驚利耳惟自昔互市以金繒不以銀幣良以銀
之用廣故嚴中外之防况雅片一物於人心風俗陷

溺至深尤不可不亟謀禁革然事必探討本源力求
明效竊以爲禁之之要大端有二一日專絕暎夷之
互市以攘其外一日廣興粵東之地利以安其內中
國之御四裔也來則撫之貳則絕之此不易之道也
故明季因倭寇而專絕日本 國初因閩疆未靖專
絕南洋今暎夷數桀驁不循法度又以酖毒之雅片
病我華人竭其重利動恃堅舶大礮扞觸法禁是久
貳於 天朝宜絕之以懾服諸蕃也明詔其國歸其
人不與通市諸蕃非暎夷屬者仍販易如故加之約
束乃選將練兵修邊備飭舟師密其哨巡絕奸闌出

入彼雖黠當亦無所售其狡謀焉然而雅片者天下之巨蠹而粵之奸僧罷民久據爲利藪者也雅片絕則利藪亡非聚而爲盜則仍暗相勾引耳故必興一利始可除一弊我之利興則彼之利塞况彼利之適所以害之乎宜簡良吏勤懇化導興富教之術開山林陂澤之利講求耕桑漁佃樹畜之法考匠藝之事舉游閒失業驅就農工予以生計使其無閑民則奸萌不生少窮民則廉恥自立要諸以漸持之以恒粵民化則門戶堅藩籬固於是由邊而及腹由邇以及遠推而準諸天下實坊民正俗之至計也而或以粵

關權稅助軍國之需絕其互市則課絀不知嘆夷來
船雖多皆專載雅片其他貨物半屬粗窳輸稅無多
即使捐百萬市舶之稅不猶愈於漏千萬雅片之貲
乎況又未必然也或又以嘆夷獷悍絕之則邊釁啓
不知彼之兵船游奕海上伺我有日矣無端突入內
河損我礮臺早已見之平昔昨以查起雅片又復搢
礮相持是其狡焉思逞正不待閉關之後也故我之
防禦不可不嚴大集戰艦示以威稜設戍守之方廣
水師之畧彼知有備則可折其奸謀卽或寇邊亦足
恃以無患揆測今日夷情非戰無以服之彼惟久恃

天朝寬大不懲創則益陸梁蓋兵以不得已而後用也或又以東南沿海萬餘里增兵益餉如國計何不知各省防海之整臺如故也各水師如故也會哨巡緝又如故也勿須增兵從何益餉不過於舊日之條教號令實力奉行卽足制蕃舶之侵較絕內奸之接引矧復申明之而益求其精豫謀之而防維加絀無警常如有警則有警仍如無警也又何至風鶴時驚徵調繹騷也哉或又以嘆夷於外洋擇島爲塵我之商漁前往私市別國蕃舶夾帶入口又烏從而絕之不知稽查商漁盤驗蕃舶法禁極詳而賄賂敗

之上之使下與下之奉上皆具文故事而已誠能循成法懲覆轍舉積弊而廓清之又安往而不令行禁止也總之徒法不行得人則治如閩外得數良將如俞武襄戚武毅以治其兵郡縣得數良吏如召南陽龔渤海以治其民則富强之效見安攘之迹著區區西蕃不足辱我鞭箠矣

盾墨卷之四終

〔一〕

若盡如羅軍門之
宣力行間則一鼓
撲滅矣何須乎
完體將軍之
多耶

〔二〕

庸臣貪夫以四十
萬金許啖夷設
五馬頭至今為
國家大患猶復
留性命於人間
能無愧死

〔三〕

聞此事據傳聞而
與師新安人內外
一氣國家真為
貪庸所誤也